

*ENKIKOO NAIPITA ERIKORE E
KANISA*

(Olapa liare 2009) (Revised and corrected version)

*(Olaigeroni: Paul Highfield – Saruni Ole
Ntayia)*

ILARETOK O ENASHE

Cosmas Lemein, o lkulikae lalashera ootii entumo
olarikok tolkoroi. Ashe oleng! Ashe sii te Nkai amu
ninye naisho iyiook enkidimata pee kias ena siai.
Kayieue nashukoki sii Angela Highfield enashe amu
ninye natoosho ina pisha natii enkomom
olchoni lena buku.

ERISHATA NAIGEROKI O COPYRIGHT

2009 Ore Copyright naa enena ampuni naji Christian
Restoration Ministries 3247 N. Nixon Ave.
Springfield, MO 65803 USA. Ore pee iyieue niyioulou
enaipirta kuna bukui tisiraki Cosmas Lemein te Box
110, Narok, Kenya, aashu email enye te:
cplemein@gmail.com. Ore nampa e simu enye naa:
Safari com - 0725975651. Toliki sii ninye tinidol
inkitapong'ot tiatua ena buku. Ore pee iyieue niliki
Olaigeroni Paul Highfield shakenisho ino tenkaraki
eretoto ena buku, indim aigeroki ninye te email enye
te: prhighfield@mchsi.com. Ataasishore ina oshi
Bibilia nikiata te Kimaasai.

ENKIKOO NAIPIRTA ERIKORE E KANISA

1. Kenare nenyorraa olarikoni pee esuj neiteng'enisho sii imbaa pooki e Bibilia naaipirta enkoitoi enjeunoto, anaa tenkitanyaanyukoto, osalaba le Yesu, empiunoto enye, inchere era iltung'ana pooki ilaing'okok neyieu Olaitajeunoni, enkirukoto, enkirridunoto, enkibalunoto enkarna e Yesu o enkitoria enye tiatua enkishui enye, enkibatisa te mpalakinoto oo ng'ok, o enkoitoi e sinyatisho.

2. Nenare nenyorraa olarikoni pee meponaa inkituaak. Enkikoo naipirta ena bae: Keibala inchere ore pee king'or Bibilia telulung'ata (inchere ekidol isipat e Bibilia teumata alang tiniking'or ilkererin moo obo lemeitululung nena sipat naatii Bibilia) naa ore enkiyama enkitok nabo naa empukunoto enkitabaroto enayieu Enkai. Ore tenkaraki ena kipirta naa kenare nikinteng'en Ilmaasai enkiyama enkitok nabo anaa eyieunoto Enkai too Lmaasai. Ore tenkaraki ina matonyok pee kisuj kuna baa:

Maiteng'ena iltung'ana enkiyama enkitok nabo anaa eyieunoto Enkai too ltung'ana pooki. Kake, ore pee eiruk oltung'ani neirridu naa ekimbatisa pooki ng'ae oyieu neibatisai ata tenaa keyama apa inkituaak kumok eton eitu eiruk. Tenetem Olmempai

(Olairukoni) ake ninye obo loonkanisani ang aponaa enkiyama enye kenare nikitem aasishore enkikoo te nyuaata emborron aaibelekeny ninye aarishie ina oitoi emponaroto e ai kitok.

Tenetem Olmempai aisho entito enye oltung'ani oidipa ayamisho naa kenare nikitem aikok ninye te nyuaata emborron pee eibelekenya teina oitoi nayieu ninye.

Naa te nemut olmempai ake ninye oje alo dukuya ayam enkitok eare naa kenare neikok ilarikok le kanisa ninye pee epal eton eitu eas ina bae. Naa tenelo dukuya aas kenare neing'oru ilarikok enkoitoi pee eikok ninye tenguton.

Enaipirta ilarikok loonkanisani (eldas):

Ore anaa enalimu 1 Timoteo 3:2 o Tito 1:6 tenaa keipirta eoro enkitok olpayian, enkiyama oonkituaak kumok, arashu keipirta oltung'ani leme loloito, keibala inchere keitodolu ajo ore ilarikok le kanisa naa kenare neata ninche embulunoto o shakenisho tenguton tenaipirta enkiyama enye.

Ore tenkaraki negol oleng lelo kererin pee eibalunyeiki, kenare neibalunyeiki te wang'an e lulung'ata elimunoto eng'eno e Bibilia arashu enkipirta telulung'ata oolaigerok lolning'o Ng'ejuk.

Matadamu kuna baa: Ore tiniking'or tenguton oleng ele kereri le 1 Timoteo 3:2 naa ekidol ajo keipirta oltung'ani lemeata eleyiata. Ore ewang'an e lulung'ata elimunoto eng'eno e Bibilia naa empiris Enkai natii atua enkeeya e Yesu too ng'ok ang alang

enkiroishi oonkitanapat. Ata Enkai openy makewon naa keishoru rishat oo nkatitin e mpiris metaa keasishore Ninye enkipankata nang'or o metaba anaa nebau enkipankata bayaroti. (Tenkitanyaanyukoto, ilasarri tolning'o musana, enkiyama oo nkituaak kumok, o teneyam oltung'ani enkitok olalashel lenye otua).

Neaku, kenare nikias kuna:

Ore tena ishoi tenakata oo Lmaasai etaa kegira abulu kanisa metaa ketii ilpayiani ooata enkitok nabo ooidim aatorikoi kanisa. Neaku, tenaa keidimayu kenare nikigelu ilpayiani ooata inkituak maa nabo ake. Kayiolo ajo menyaanyuk iwuejitin pooki neaku ebaiki eton etii erishata pee eishori metaa ore olpayian arikoni le kanisa nerikoo kanisa ata hoo tenaa oloo nkituaak kumok arashu ole nkitok nabo naa te yioulounoto taa inchere keiruk ninye inchere enkitabaroto Enkai enkiyama enkitok nabo naa pee eitashe teine ina kata pee elotu airuk Kristo.

Ore anaa enaing'ori ilarikok le kanisa tenkoitoni nagol (Yakobo 3:1), ore ilpayiani arikok pooki le kanisa olelo kulikai ootii enkiteng'enare pee eaku ilarikok, naa pee enyorraa neyiolou inchere keikilikuani ninche pee eitadouni te rikore oolarikok le kanisa teneitoki aaponaa nkituaak arashu eponiki inkera enye anaa kulikai payiani oidipa aataa keata enkitok nabo edukuya.

3. Ilarikok kalamasi lemetem katukul aajo maitasuro inkanisani ang ilkuaaki le kulikai airukok aashu loo nkulie anisani lemenyorraa inkanisani ang arashu etem aajo mayau iloong'oling'oli kanisa aashu inkanisani oo murua ang teumata (1 Tim. 4: 1-8; Marko 13: 22, 23; Iroma 16: 17; 1 Tim. 1: 3, 4; 3: 1-5; 6: 3-5; Tito 3: 10; 2 Yohana 1: 10).

4. Ilarikok ooitodolu mpukunot etipat nautuno te 1 Timoteo 3: 1-13; o Tito 1: 5-9.

5. Ilarikok ooidim aataramat ilmareita lenye aaitobiraki neisiligayu (1 Timoteo 3: 4, 5)

6. Ilarikok ootegeluaki neishoro enkidimata te Nkai o to sesen le Kanisa narayie ninche erubata (Iasat 6: 1-6; 14: 23, 24; Titus 1:5).

7. Ilarikok oorikito Enkiyang'et (Roma 8:5-17). Kake matadamu aajo meitodolu ina ajo meidimayu pee kiata enkipankata.

8. Ilarikok oogira aaing'oru ilkulikai tung'ana oaku ilarikok ng'ejuko. Kegira aaiteng'en sii lelo tung'ana tenguton negelu lelo oiririkino errepet sidai ororei le Nkai (11 Timoteo 2:2; Ile Efeso 4: 11-13, 14; Matayo 28:18-20).

9. Ilarikok oogira aaiteng'en likai tung'ani obo (11 Tim. 2:2).

10. Ilarikok laa ore empukunoto erikore enye naa ketem aajo maigarakinoto erikore enkitadounoto emaate tenkisiayiare enye nemeishiaakino naa ilarikok ootem aaku ilaitoriak leilo turrur oitasheiki aashu etem aajo mataasishore tenkaraki dupoto oo masaa (Marko 10: 35-45; Yohana 10:1-15; Iasat 20:28-31; 1 Petero 5:1-4).

11. Ilarikok ooitamanyu enkitanyaanyukoto sidai tenkomono, te mpukoroto, te yiolounoto ororei le Nkai o teng'arata oo lomom Supati (Esra 7: 8-10; Nehemia 1:1-11; Ile Efeso 6:18; Iasat 13:2, 3; Tito 1:9; 11 Timoteo 3:15, 16, 17; 2:15; 4:1-4; Matayo 28: 18-20).

12. Ilarikok ooibung aakurraki ina kiteng'enare nasipa e Kristo o Ikipaareta lenyena te Bibilia nemesilaa inkiteng'emat ng'ejuko naagilunore Bibilia. Naa iloodim sii aatang'or ena kirukoto e Kristo neng'arie sii ilkulikai. Neyiolo inkatinin aa inchere inkopa naaipirta inkitapong'ot tiatua nkiteng'emat e taata (Tito 1:9; 1 Timoteo 4:16; 6:3-5; Hosea 4: 6).

13. Ilarikok arriyiak tenkitotioto esirit enye tenguton, neata enkitashoto, neitotisho tenkiteng'enare e Bibilia (Yohana 21:17; Iasat 2: 42; 11:25; 20:27,28; 1 Petero 5:2; 1 Timoteo 3:2; 4:13; 5:17, 18; Tito 1:9).

14. Ilarikok oibalie ate too nkiaasin tenkisiligata (integrity) neisulaki te ramatare oo ropiyiani (Tito 1:7).

15. Ilarikok oitobir olning'o tedukuya Enkai o tedukuya esirit pee eiteng'en, nelikioo ororei le Nkai, neiteng'en obo obo neitubulu too nkiririkinot tenkata torrongo o tenkata sidai ata hoo tenaa kelaakini olmushaara arashu melaakini (11 Tim. 4:1, 2).

16. Ilarikok oonyorraa aajo keata pooki tung'ani te kanisa tipat neata sii inkishoorot enyena neaku keasisho kila oltung'ani te kanisa mme ilarikok ake. Neaku, ore ilarikok naa ilaretok ooramat ilmempai le sirit too nkiririkinot anaa iloogira aasishore inkishoorot enye einoto o nena kulie kishoorot naashoro Enkiyang'et tenkaraki pee eitubulunyie esirit teumata osesen (1 Petero 2:4, 5, 9; Ile Efeso 4: 11-14).

17. Ilarikok oonyor aashom nkoosi e Bibilia naatae too wuejitin tenkaraki pee eretunyie ate neretunyie sii ilkulikai tenkiteng'enare amu eitobiraki nena koosi tenkaraki ninche. Kake keas pooki tenjurrunoto nagut (Ilheb. 4: 12, 13; Olkerempe 119: 11, 37, 105, 111, 173; Iasat 20: 28-31; 2 Petero 2: 1-3).

18. Ilarikok oata enkidimata pee eitubulu, nererioo, neutaa (11 Timoteo 2: 20-26) tiatua inkanisani e Murua pooki, neishiaakino sii naa ilooyiolo aataas ina (11 Timoteo 4:2).

19. Ilarikok lemenauru eing'oru ilmempai le Kanisa oomina pee errinyu (Matayo 18:15-20; Ilgalatia 6:1-5; Yakobo 5:19, 20; Esekiel 34:1-31; Ndung'eta Erashe 24: 11,12).

20. Ilarikok oorerioo nkiteng'emat elejare (1 Timoteo 1: 3, 4; 11 Timoteo 4:2-5; Iasat 15; 20:20-31). Neaku, kelimu ina inchere kenyorraa ilarikok pee easishore kulie rishat enchankar oo nkiririkinot pee ererioo nkiteng'emat oolomon Supati naapong'ori. Neaku, meishiakino teneing'oru ilarikok eseriani ata tenaa keponari inyamalaritin too nkulie rishat. Neaku, keikash tenenyorraa toltau lenye pee elotu enchankar enkiti rishata pee esidanu imbaa.

21. Ilarikok ooyiolo neidim sii atasishore imasaa olarrabal le Nkiyang'et – Ile Efeso 6: 10-20; 11 Ilkorintio 10: 4-6.

22. Ilarikok ooyiolo eneiko pee eipanka neiturukie imbaa neata **nduaat** oo nkolong'i e Kanisa enye. Tadamu ina atini naipirta Ilaikitalak te mbuku Enkikena ematua 13.

23. Ilarikok ooata enkirukoto too rishat pooki – ina kata easishore Enkai engolon enye too mbaa enking'asia (1 Ilaiguanak 18:16-40 ; Iasat 5:12-16) oina kata sii easishore engolon enye too neegol oo too nkisilisilot enkitamioto, eng'iriata, enchipai enashe (Ilkolosai 1:11, 12, embulunoto Enkiyang'et

tiatua, o eyiolounoto enkiyang'et (Efeso 3:14-18).
(Eng'urai sii 11 Ilkorintio 6: 3-10; Yohana 20:29; 11
Ilkorintio 1: 3-7;
12: 7-10).

24. Ilarikok ooyiolo nkishoorot enye engolon, o
enchalan neata sii iyieunot pee enyorraa enchalan
enye. Ore enkata naishiakino neng'ar enaipirta nena
rishat naatapong'ori pee eaku eutaroto too lkulikae.
Neaku, sii doi ninche ilarikok oojurr ate (11 Ilkorintio
13: 5; Matayo 7:1-6).

25. Ilarikok ooyiolo erishata nairirikino pee ejing
atua enyamali naje pee ererioo, oe rishata
naitadounyie ate pee eanyu erishata sidai Enkai
metaasisho anaa enayieu Ninye. Aashu inkulie
rishat ebaiki neitarasaki Enkai ina bae katukul negira
pee edol enaas Enkai (Olkerempe 27:14; 11 Timoteo
4: 2; 2 Ilaiguanak 19: 14-37).

26. Ilarikok ooyiolo aaitarasaki ilkulikai airukok
isiaitin e Kanisa (Enaidurra 18: 13-27; Iasat 6:1-7).

27. Ilarikok arriyak teneikok iltung'ana neitobir
inyamalaritin tenkoitoi osotua le Nkai. (Matayo 5: 9;
18: 15-20).

28. Ilarikok ooata enkitagoloto enyuaata emaate
neisosion aas imbaa kake temborryon, to sotua, o
teng'iriata sii (2 Timoteo 1: 6, 7; 2: 22-26; 4: 2-5; 1
Tim. 4: 15).

29. Ilarikok ooata enyorrata o enkanyit te pooki ng'ae (1 Ilkorintio 13; Iroma 12:16; 13: 9,10), neisulaki too nkituaak enye olmareita lenye maate (Efeso 5: 22 – 33).

30. Ilarikok ooidim aatawal nkikilikuanat naaipirta Ilomon Supati le Nkai. Keishiakino pee eyiolo ninche Bibilia. (1 Petero 3: 15; 11 Tim. 2:15).

31. Ilarikok oibalunye enaikununo isiaaitin pee eyiolou ilkulikai nena siaaitin tenkoitoi naibala. Neaku, keibala inkirorot enye to lkulikae (1 Tim. 4: 11-13; 1 Ilesalonike 2:3-5).

32. Ilarikok ooisiligayu nesujaa too nkitabarat nena naajo keas (11 Timoteo 2:2).

33. Ilarikok ooata enkitagoloto too mbaa e dupoto oo lairukok, kake mme too mbaa e dupoto olkuaak [(ina kata egilunore nena baa ororei le Nkai), Matayo 5: 1-12; Marko 8: 34-38; 9:33 –37; Luka 12: 49-53; 14: 25-35].

34. Ilarikok ooisilig Enkai too ltauja le sipata (Ndung'eta Erashe 3:5).

35. Ore pee eloloito olarikoni naa kenare neitadouni te rikore e kanisa o metabaa anaa nikidol aajo eirridua

katukul nikintoki aadamu tenaa keishiakino pee eitoki ajing ninye atua erikore e kanisa (1 Tim. 4: 2-5).

36. Naa keidimayu pee eas sii olarikoni inkulie baa torrok nemeishiakino. Meidimayu pee kinger pooki tene kake keidimayu pee kiimaki tenebo. Ore pee kidol aajo etabatate aashu etijing'a atua ng'ok naaje nemeyieu nepal, keidimayu pee eitadouni te rikore e kanisa (Matayo 18: 15-20; Ilgalatia 6: 1-4).

37. Ilarikok ooata empijan naipirakinore ng'ok pee mepalaa ake ng'ok arashu etum inkitolonyat oo ng'ok. Nesujaa sii Matayo 18:15-20 ina kata eyieu neutaa ilo oipirakinore ng'ok (Eng'urai sii 11 Timoteo 2:25, 26; 4:2; Yuda 22, 23).

38. Ilarikok oosujita esipata tenguton tenkishui enye pooki, too nkirot enye, o too nkiteng'emat enye. Ore tenkitanyaanyukoto naa ilarikok lemetem aajo mairoro mbaa enye tengolon pee erup ate arashu pee eyietaa esipata pee etum imbaa enye errepet hoo naa ebaiki nemesipa oleng. Ore ti ai kutuk naa inchere, pee memerregel ororei le Nkai tenkaraki dupoto enye maate (11 Ilkorintio 4:2;1 IIses. 2: 5, 6; 2 Petero 3: 14-16).

39. Ilarikok ooata eng'eno tenaipirta mbaa naatii Bibilia telulung'ata pee meaku ake ilo oing'or enchoto nabo oolkigerot le Bibilia kake pee eing'or ilkererin pooki ata tenaa etiu anaa kegilunore lelo

kererin oonyor ninche. Ore tenkitanyaanyukoto, naa inchere pee meing'or ake isirat lo laigeroni obo le Bibilia arashu empukunoto nabo oolkigerot (anaa te Injili), arashu matejo olkereri obo aashu aare ake le nkipirta nabo. Kake keishiaakino ake pee ereikini neyanyutuni too nkiririkinot irubat pooki e Bibilia. Ore ti ai kutuk naa inchere, kenarikino pee eata eyiolounoto oo nkiririkinot eng'eno pee eibalunye ilkigerot le Bibilia tenkoitai naishiakino te lulung'ata. Neyiolou sii aajo ore ilkigerot le Bibilia pooki naa eibalunyeiki tenkipankata inchere eitu eibalunye Enkai pooki toki tenkata nabo kake too rishat. Tenkitanyaanyukoto, melulung'a Osotua Musana tenemetii Osotua ng'ejuk. Nemelulung'a Injili metii inkulie bukui o sotua ng'ejuk (Ilhebrania 1:1-4; 11 Tim. 2:15; John 5: 24 tenebo Iasat 2: 38; 3: 19; 1 Petero 3:21). Ore olkereri oata tipat oleng oipirta ina naa Yohana 16: 12-15; 14:26.

40. Ilarikok oowang iltauja (11 Ilkorintio 6:12, 13) nenyorraa pee eibalunye enchan enye (11 Ilkorintio 11: 29, 30). Neme sii iloo mpukunot oltung'ana oata olwuasa, nereiki empukunoto engolon enye oleng o metaba anaa neitalamaa iltung'ana (11 Ilkorintio 11: 30-33; 12: 7-10; 13:4). Nemeiteng'en ninche tenkoitai naitodolu ajo lasima pee kishipa oleng inkatitin pooki (Eng'urai 11 Ilkorintio 2: 12, 13 ine netigilieki neitashalieki oltau le Paulo; Eng'urai sii Olaikooni 3: 1-8; Matayo 5: 4; Yohana 11:35).

41. Ilarikok ooyiolo empaashata oltung'ani otii enkoitoi esujaroto o mbaa e kanisa tioriong (oltung'ani oyiolo olkuak le kanisa enye nesuj kake meyiolo Yesu toltau lenye, neitu sii eirridu tenguton) o ltung'ani otii enkoitoi Enkai naishu (Marko 12: 38-40; Matayo 23).

42. Ilarikok ootaa ilopeny esiai e kanisa tiabori enkitasheikinoto e Yesu. (Iasat 20:28; 11 Ilaiguanak 2: 1-16; Yohana 3:30). Matadamu oleng ajo era Yesu elukunya e kanisa anaa enalimu Ilkolosai 1: 18; Efeso 1: 22.

43. Ilarikok ooserem Enkai toonkoitoi pooki o tenkishui enye mme ake duoo te Jumapili ake, kake te pooki kata (Iroma 12: 1- 2).

44. Ilarikok ootoni te sinyatisho o tenkisiligata (inchere keisiligayu ninche too mbaa pooki) neing'or imbaa too nkoitoi Enkai (11 Ilkorintio 7:1; 4:16; Ilfilipi 4:4-9; 11 Timoteo 2:20-24; 1 Tim. 6:11; 1 Samuel 12: 1-4).

45. Ilarikok oing'or nena nemelioo nepuoyie enkirukoto kake mme nena tokitin naalioo, kake ore ake eyia neton ake memenaa nena naalioo inchere meitelelek nena baa naagol tena kop (11 Ilkorintio 4: 18; 5: 1-10).

46. Ilarikok oure (aashu ooyanyit) Olaitoriani (11 Ilkorintio 5: 11).

47. Ilarikok laa engolon enyorrata e Kristo narikito (11 Ilkorintio 5:14; 1 Iلسsalonike 3:12; 11 Tim. 1:7; 1 Yohana 4: 18).

48. Ilarikok oodol ate anaa ilaisiaayiak tenebo Enkai (11 Ilkorintio 6:1).

49. Ilarikok lemetem aawuasare nena naataasa, ata tenena nataasa Olaitoriani tialo ninche, kake pee eiro ninche tenkoitoo naa Olaitoriani ake eisho errepet (11 Ilkor. 10:17, 18; Iasat 12:19-24; 11 Timoteo 3:2; 1 Ilkor. 13:4; Igalatia 6:14).

50. Ilarikok laa ilo Yesu Obo edamu ninche anaa ake, olaa ninye oota enkidimata pooki enkitoria (Matayo 28:18; Yohana 5:26, 27; 1 Petero 3: 22) netii sii ninche abori enkidimata Enye. Nedamu sii inchiere ore anaa enikira iyiook ilarikok nimikira ilopeny ina kidimata kake kiaasishore anaa enaishori iyiook (Tito 2:15; Matayo 10:1; Ilhebrania 13:17), kake ata ake eyia neijia, neton ake mme enkidimata nalulung'a (Iasat 3: 12).

51. Ilarikok laa kaaminin tiatua Kanisa (matejo duo naaji tematua e tomon) o te kulie mbaa ake e Kanisa (Isaya 58: 6-14; 1 Tim. 6:17-19; 11 Ilkor. Imatuan 8 – 9; Malaki 3: 6-18).

52. Ilarikok ooisiligayu te Nkai o tialo olikae olikae (ketii eutaroto tiatua ilarikok) (Yakobo 5: 16; 1 Tim. 3: 2; Esekiel 3: 20,21; 34: 1-31; Ile Efeso 4: 25-27; Iroma 14: 12, 13; Ndung'et erashe 13: 18; 15: 31, 32; 19: 20; Matayo 25: 14-30).

53. Ilarikok ooramat inkerra Enkai (Esekiel 34: 1-31; Iasat 20: 18-35; 1 Petero 5: 1-3).

54. Ilarikok ooirridutua tenguton neton ake epuoito dukuya te wang'an o tenguton too nkoitoi enkirridunoto (1 Yohana 1: 8-10; Yakobo 5:16).

55. Ilarikok lemeshum engoro o enkiba neyiolo aaitamoo ate tenguton empalakinoto esipata (Ile Efeso 4:31,32).

56. Ilarikok oosuj isipat naaing'uaa embuku e Nehemia naaipirta erikore, enkomono. Enkomono 2:4; eng'eno 2:12,16; 6: 1-14; Ilarikok oata enkitieunoto (empijan) 2: 17-20; 4:1-9; enkitagoloto oolkulikai 4: 14; enkisiligata Enkai 4:15; enkisikong'ata 5:1-13; emborron 5: 14-19; neiteng'en iltung'ana pee eirridu 9: 1-38; 13:23-31.

57. Ore olarikoni naa kejur oleng enkishui enye o enkiteng'enare enye anaa enalimu Paulo te 1 Timoteo 4: 12, 16; 1 Iلسes 4: 3-8.

58. Kejur inkatinin o shakenisho oo Itung'ana pooki amu keeta iltung'ana inkatinin kumok kake ore enkipimet ang naa ororei le Nkai (1 Tim. 4: 7, 8; 2 Peter 2: 3).

59. Ilarikok oitamok ate Keitamok kewon enkoittoi Enkai metaa **kenyok oleng** pee esuj imbaa naaipirta ererioto enkiyang'et (1 Tim. 1: 3, 4; 4: 7, 8).

60. Ilarikok oasisshore inkishoorot enye – 1 Tim. 4: 14; 1 Peter 4: 10.

61. Nepaash inchankarrin nemeeta tipat – Tito 3: 9.

62. Neigarakino Enkai anaake neitarasaki Enkai enchan enye te nkomono, neomonoki sii ilkulikae (Ilfilipi 4: 6-7; 2 Ilkor. 12: 7-10; 13: 4).

63. Neyiolo eneiko pee eimaki imbaa naagol nemetum engoro – Yakobo 1: 19, 20. Neyiolo sii aajo meyiolo oltung'ani obo imbaa pooki anaa enajo Ilmaasai pee ejo, "**Meishaa elukunya nabo eng'eno.**"

64. Kenare neretu olarikoni kanisa enye pee etum enkipirta naibala netum sii induaat naaipirta ina kipirta pee elo dukuya kanisa aitobiraki. Ing'orai embuku naigero Saruni Ole Ntayia (Paul Highfield) naji *Induaat Naarikoo Kanisa Pee Ebulu* pee itum imbaa kumok naaipirta ina bae (*Vision Led Church* te Kingeresa).

65. Keyiolo olarikoni eneiko pee earare ilaitoriak loo mpukunot kumok le nkiyang'et aa shetani tenebo ilmalaika lenyena. Keliki iyiook Efeso 6: 1-20 enaipirta iruparen aashu imasaa ang pee kimir ninche. Keretu sii iyiook 2 Ilkor. 10: 3-5 pee kiyiolou enikinko pee kiarare inkiyang'eta torrok.

ESIAI OLARIKONI KEWON (ELDA)

1. *Keirrita intare* - Iasat 20: 18-35; 1 Petero 5: 1-4; Ilhebrania 13:17; Yakobo 5: 14; Tito 1: 9

- (1) Keirrita intare pee mepuonu ilowuarak aanya.
- (2) Kebaiki ilairukok le kanisa neomonoki ninche.
- (3) Kebaiki iltamueyia.
- (4) Olpastai oaku enkitanyaanyukoto.

2. *Keimaki inyamalaritin neimaki sii inkulie baa e kanisa* - Iasat ematua 15.

3. *Neretu ilkulikai larakok tenebo olpastai pee esipu enkipirta e kanisa netum induaat o nkipankat naaipirakinore ina kipirta pee elo dukuya kanisa aitobiraki.* (Ing'orai embuku naigero Saruni Ole Ntaysia (Paul Highfield) naji *Induaat naarikoo Kanisa pee Ebulu.*)

4. *Keas esiai e kanisa te eyieunoto sidai nagol* - 1 IIsesalonike 5: 12, 13 Ore ilo rorei “oasisho” te nkutuk Olgiriki naa keipirta tene oltung’ani oasisho tengolon oleng. (Keji te nkutuk Olgiriki “kopiontas”).

(1) Neaku, melepori te esiai e kanisa - keisosion pee eas esiai e kanisa (2) Nemejo, “Inchoo eas ilkulikai,” kake keas ninye. Neaku, meata inkitolon-yat pee meas esiai e kanisa.

5. *Keiteng’enisho ororei le Nkai* - 1 Tim. 3: 2; 1 Tim. 5: 17; Iasat 6:4.

(1) Keing’oru irishat pee eiteng’en ororei le Nkai.

(2) Keiteng’en ilairukok, neiteng’en ileitu eiruk (Matayo 28: 19, 20), o ilkulikai ooyieu neaku ilarikok (11 Tim. 2: 2).

6. *Keomon* - Iasat 6: 4; Ing’orai sii enkitanyaanyukoto e Yesu - Marko 1: 35- 39; Ilfilipi 4: 6, 7; Efeso 6: 18, 19.

7. *Esiai olarikoni/elda/olpastai* - Keas sii ninye nena pooki, neas sii kuna:

-- Ninye oitasheiki nena siaitin pooki metaasi.

-- Neretu pooki arikoni pee eyiolou inkishoorot enyena pee eas isiaitin naairirikino ninye amu ebaiki nera arriyia te siai naje.

-- Naa keiteng’en sii ilkulikai arikok tenguton.

-- Neipot intumoritin pee eimaki imbaa e kanisa.

-- Neomonoki ilkulikai arikok neomon sii tenebo ninche.

-- Keitasheiki inkipankat e kanisa naaipirta induaat o inkipankat naaipirta embulunoto e kanisa o naaipirta erikore e kanisa, enkiteng'enare pooki e kanisa, elikioroto ororei le Nkai, eretoto oolkulikai oota inkolati, o naboisho)

-- Keretu ilarikok pee eyiolou enkipirta e kanisa pee eata induaat olkitamanyunoto sidai. Keomon sii ninye oleng pee etum induaat naing'uaa Enkai pee eng'arie ilkulikae arikok neimaki tenebo enaiko pee etum induaat sidain. Matadamu enatejo ti ai buku naji, *Induaat Naarikoo Kanisa pee ebulu*. Atejo inchere: "Iroruat naaret olupastai pee etum induaat sidain -- ***Tayiolo kewan*** - Tayiolo tenaa iata enkishooroto pee ias ina siai. Amu, ebaiki nijo iyieu nias kake miata enkishooroto pee ias. Etejo 1 Petero 4: 10, ***'Taasishore inkishoorot naaba anaa inikinchooki aisiaayie ilkulikae, anaa olaing'urani supat te mpiris e Enkai oo mpukunot kumok.'*** Ore pee miata enkishooroto pee ias esiai olupastai naa eisidai teninyorraa apal ina nigelu ai siai nias alang te nerruoyo kanisa tenkaraki iyie aashu ebaiki neitashe tenkaraki nimiata induaat sidain naaipirta esiai e kanisa.

Inkilikuana sii kewon ajo ainyoo pee iyieu nias ina siai olupastai. Amu, tenaa iyieu nias ina siai olupastai tenkaraki olwuasa aashu tenkaraki iyieu nintore ilkulikae naa keikash tinipal alang tininyial kanisa. Neaku, tisipu oltau lino pee milo dukuya tina siai tenkaraki imbaa torrok.

Tayiolo sii ajo kakua siaitin aashu kakua duaat inyor oleng nindim ataasa tenchipai oleng anaa ninche iyie ninturukie too mbaa pooki. Amu, ore pee isipu nena baa nilo dukuya aas. Neidimayu pee ing'oru ilkulikae tung'ana ooas nena kulie baa niminyor aashu nimiindim iyie ataasa. Kake matadamu aajo ore inkulie katitin ketii isiaitin nimikinyor kake lasima pee kias amu metii likae ooas. Kake ore pee kias ninche teng'iriata ebaiki nelotu erishata pee kitum likae tung'ani oidim ataasa nena siaitin.

Tayiolo iltung'ana te murua ino, iltung'ana te kanisa ino, iltung'ana ootii inkulie kanisani. Tayiolo sii inyamalaritin naata iltung'ana naamitiki eponu kanisa. Ore pee isipu imbaa naaipirta lelo tung'ana pooki naa ekiretu iyie pee itum induaat naaipirta kanisa.

Tayiolo Enkai. Toinyuaa oleng tayiolo ororei le Nkai tenguton. Tisipu ilarikok ootii Bibilia pee iyiolou inkoitoi nataasishore ninche pee eyiolou eyieunoto Enkai. Inturukie oleng enkomono pee ining enayieu Enkai. Tadamu sii pee ipukoo aen kewon inkulie katitin pee ining Enkai.

Inkilikuana sii ilkulikae arikok le kanisa enaipirta induaat inono pee itum enkikoo enye pee mipong'ori. Kejo Ilmaasai, 'Meishaa elukunya nabo ng'eno.' Kejo ororei le Nkai, '*Ore enemetii erikore, naa kebatata olorere; kake ore enetii*

ilaikook kumok netii eseriani' (Ndung. 11: 14). Nejo sii, *'Toning'u enkikoo ning'amaa enkiteng'enare, pee itum anoto eng'eno too nkolong'i naapuonu'* (Ndung 19: 20). Neitoki ajo, *'Ore nkitobirat pooki neitasheyieki te nkiguana; te rikore natii eng'eno atua epuoi olarrabal* (Ndung. 20: 18)." ¹

(8) Keipot olupastai erikore e komiti neitasheiki sii. Nyenyok pee eyiolou imbaa naaipirta inkulie kanisani ang naatii emurua enye.

ESIAI OLARETONI (DEACON)

1. **Keretu iltung'ana ooata inkolati** - Iasat 6: 1-7
anaa: inkolia, iltamueyia, o laisinak.
2. **Keasishore imasaa o ropiyiani pee eretu ilkulikai** - Iasat 4: 32-35 (Meipirta ilaretok ake tene kake keipirta ilairukok pooki kake ore enadolita nanu naa eisidai pee eata sii olaretoni olkuak laiyo ilo.) (Tadamu pee miata "olorok le dupoto" (1 Timoteo 3: 8).
3. **Ore kulo aretok ooata enkishooroto elikioroto ororei le Nkai naa keasishore** - Stefano Iasat 7 o Filipo Iasat 8. Kake matadamu aajo ata tenaa meeta enkishooroto elikioroto ororei le Nkai kewon eton eishiakino pee eng'arie ninye ilkulikae ororei le Nkai anaa enajo Matayo 28: 19, 20.
4. **Ore inkatitin kumok naa keata ilaretok inkishoorot olng'ur, eleng'on o eretoto** - Iroma 12:8 Naa Yesu enkitanyaanyukoto ang - Marko 1: 40-45; Matayo 9: 35-38, Ing'orai sii Iasat 9: 36- 43

5. Inkoitoi naaidim ataasishore ilaretok pee eretu kanisa:

- (1) Keretu elelero aitubulu tiatua kanisa.
- (2) Keretu eseremare e kanisa.
- (3) Keitasheiki eramatata e plot e kanisa pee esidanu.
- (4) Ebaiki neitasheiki sadaka.
- (5) Kebaiki iltung'ana le kanisa enye o lelo ootushukote siadi.
- (6) Kelikioo ororei le Nkai tenaa keata ina kishooroto.
- (7) Neiteng'en ilkulikai airukok moo obo
- (8) Neiteng'en ilkulikai airukok pee eaku sii ninche ilaretok le kanisa.
- (9) Neretu inkituaak
- (10) Neomonoki ilarikok le kanisa.
- (11) Neomonoki sii ileitu eiruk.
- (12) Neiteng'en sii ileitu eiruk moo obo aashu anaa olmarei.

ESIAI OO LARETOK (DEACONS) TE NKI-TANYAANYUKOTO

Pee etum aitasheiki kuna kipankat e Kanisa:

- esiaai pooki ejikoni
- esidano (usafi) e Kanisa
- pee etum aaimaki iltung'ana lemeata iropiyiani oo nkoosi aashu iseminani
- pee eretu Kanisa te siana ooltung'ana ooponu Kanisa kila Jumapili: Ilewa, Intomonok, Nkera

- pee eshilaa Ilomon ootii Kanisa
- pee etum aaitobir (Record) enchumata oo ropiyiani e sadaka
- pee etum aaitobir enkipankata endaa Olaitoriani.

¹ George Barna, *The Power of Vision* (Ventura, California: Regal Books, 1996) 80-91 anaa enaigero te mbuku ai naji *Induaat Naarikoo Kanisa pee Ebulu*, enkardasi 97-89.